

Date – 11/06/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Larsap Gen (Rtd) Vijay Kumar Singh chuan Green Mizoram Day pualin tukin khan Raj Bhavan ah thing tiak a phun.
2. Prime Minister Narendra Modi kaihhruai NDA sawrkar kaltlanga tanpuina dawngtu Vairengte tualchhung mi ten an chhawr tangkai thu an sawi.
3. Prime Minister Narendra Modia chuan ramchhung mipui vaibelchhe 140 te beiseina tihhlawhtlin a tiam
4. Defence Ministry chuan Indian Navy te tan cheng vaibelchhe 449 man Enhanced Capability Global Navigation Satellite System (GNSS) 20 leina turin Jammers nen inremna an siam.



GREEN MIZORAM DAY

Larsap Gen (Rtd) Vijay Kumar Singh chuan Green Mizoram Day pualin tukin khan Raj Bhavan ah thing tiak a phun a, ‘Thing hi rangkachak ang hlu, Nunna tinreng bul a ni’ tih thupui hmangin Mizoram hmun hrang hrangah vawiin hian Green Mizoram Day pualin hun hman a ni ang.

Larsap chuan Raj Bhavan-a Green Mizoram Day, 2026 hman a nih theih nana Environment, Forests & Climate Change (EF&CC) Department-te hmalakna fakawm tiin, he hun hmang tura kalkhawm zawng zawngte chungah lawmthu a sawi a. Mizoram chu hmun dangte ngaihtuaha hmun hring tamna leh thing leh mau pawh engemawzah awmna ni mah se, khawvel pumah sik leh sa a inthlak danglam nasat avangin hemi lo do let tur hian uar zawka thingphun beihpui thlak zel a tul a ni, a ti a. Mizoram puma Green Mizoram Day hmangtute duhsakna hlanin, Mizoram mipuite chu thing phun leh enkawl zui kawngah theihtawp chhuah turin a chah a ni.

Green Mizoram Day pual hian Environment, Forests & Climate Change (EF&CC) Department buatsaihin vawiin hian YRC Falkland ah hun buatsaih a ni dawn a, hetah hian Forest Minister Pu Lalthansanga’n a hmanpui dawn a, Green Mizoram Day hi Courtyard, Gauhati High Court Aizawl Bench ah hman a ni dawn a, Mizoram hmun hrang hrangah pawh hman a ni ang.



HEROIN SEIZED

Mizoram hmun hrang hrangah Ruihhlo thahnem tak man a ni.

Champhai District Excise & Narcotics Department-chuan nimin khan Champhai Seventhday Adventist Workshop pengah lirthei pakhat atangin Heroin hawng 9 (Gram 99) an man a, lirthei khalhtu Ikbal Hussain (28), Karimganj Assam ni-a insawi chu an man bakah ruihhlo phurhna atana hman lirthei pawh an hrensak a ni.

Saitual Police pawhin nimin vek khan Manipur atanga Aizawl lam pana kal lurthei pakhat chu ringhlelin an endik a. A chhungah Opium Fluid ni ngeia hriat bawm 71 an hmuchhuak a, Heng ruihlo hi Kg. 45.871 a rit a ni a, tualchhunga a hralh chhawna ang chuan Rs. vbch. 2.29 hu a ni.

Thawhtanni khan Champhai Police-in Khankawn Check Gate-ah Champhai atanga Aizawl pan lirthei pakhat atangin Heroin hawng 2 an man a,

Thu dawn danin, Khankawn Check Gate-a Duty te chuan lrthei hi ringhlelin an tiding a. Uluk taka an enfiah hnuah Bag dum pakhat chhunga Reebok pheikhawk sen chhunga thuhruk Heroin hawng 2 hi an hmuchhuak a. Bap neitu Vanlalngbaka (kum 36), Tualcheng, tuna Champhai Vengsang-a khawsa mek ni-a inchhal chu an man a ni.



MUHCS

MUHCS 2.0 kalpui mek chu Kohhran enkawl damdawi in pahnih Serkawn Christian Hospital, Lunglei leh Lawngtlai Christian Hospital-in an zawm a. Hemi atana inremna thuthlung chu nimin khan Health Minister, Pi Lalrinpuii kaihhruaiin a Pisa-ah an ziaak a ni.

Inremnaah hian Mizoram Sorkar aiawhin Mizoram State Health Care Society CEO, Dr. Lalhriatzuali Ralte; Deputy CEO, Dr. Vanlalremsiama leh Chief Finance Officer, Dr. K. Lalnghinglova ten hming an ziaak. Christian Hospital Serkawn leh Lawngtlai aiawhin Pu H. Lalthlamuana leh Rev. Dr. R. Zolawma ten hming an ziaak a ni.

Tun dinhmunah Mizoram chhunga mimal leh kohhran enkawl damdawi in 18-in MUHCS an zawm tawh a ni.



NAZARETH LALTHAZUALA

Tun thla ni 5-a Bangkoka khawpuia One Championship Friday Night Fight-a hnehna chang Nazareth Lalthazuala chu nimin khan Sports Minister Pu Lalnghinglova Hmar in a Pisa-ah lawmpuina a hlan.

Pu Pu Lalnghinglova Hmar chuan nimina Nazareth Lalthazuala'n Lengpui a lo thlen laiin Muaythai leh Arm Wrestling-a Medal late lawmpuina hun an hman avangin a

hmuhnaa a tel thei lo chu pawl a tih thu an sawi a. Nazareth-a leh Mizoram State Mixed Martial Art Association hruaitute nen an inbe pawp reng a, amah lawmpuina hun pawh an team nen an ruahman a nih thu a sawi.



ECM KTP

Evangelical Church of Maraland (ECM) Krizyhpa Thyutlia Py (KTP) ten nimin khan an din champhaphak vawi 79na pualin KTP branch hrang 109 ah lawmna hun an hmang.

ECM thalai pawl din champhaphak vawi 79na hi 'Min tichaktuah chuan engkim ka ti thei a ni' tih thupui hmanga neih a ni a, Kar kalta June ni 1 atang ni 7 inkarah khan KTP week chu intih hlimna hrang hrang nen an neih a, vawiin khan a khar nan Biakin a inkhawmna neih niin, Pathian rinchhan a thiltih chuan engkim a theih a ni tih lam hawi sermon ngaihthlak a ni bawh. Inkhawm service zawh hian zaikhawmna neih nghal a ni.

KTP day pual hian branch tin ten a remchan dan angin hun an hmang a, kohran thenkhatah chuan ruai buatsaih niin, kohhran thenkhatah thingpui ruai buatsaih a ni a, Kohhran member ten hlim takin awmni khamin an lawm a ni.



12 YRS NDA

BJP Mizoram President Dr. K. Beichhua chuan kum 12 chhunga NDA kaihhruai sorkarin ram mipuite tana hma a lakna leh hlawhtlinna hrang hrang hmuh tum te tan chuan a hmuh theih a ti.

Akashvani Aizawl-in a kawmnaah BJP Mizoram President Dr.K Beichhua chuan kum 12 chhunga NDA kaihhruai sorkar chu tha tak nia a hriat thu a sawi a, kum 12 chhunga an hmalakna ropui tak tak zingah Economic sector-a GST an siam thar chu ropui a tih thu sawiin, chhiah pek dan inang tlang- one nation, one tax an kalpui chuan India chu nasa takin hma a sawn tir a ti a. Sum leh pai lama mi zawng zawng huapzo tura hmalakna, PM Jan Dhan Yojana hnuaiia bank account nei lo mi tam tak, zero balance-in bank account an han hawnsak te chuan nasa takin ram economy chu hma a sawn tir a ti bawh.

Dr. K Beichhua chuan hmasawmna ruhrel, infrastructure development lam pawh an thawk tha hle tih sawiin, leiverh, rel kawng leh kawngpui (highway) an zauh te, ramri chehhvela kawng an siam te pawh Mizoramah a taka hmuh theihin a sawm a ti a. Heng bakah hian PMAY hnuaiia ram chhunga mi rethei vbc 55 atanga vbc 65 te in sak sak tawh a ni a ti a, Swachh Bharat Mission hmang ram chung hmung hrang hrangah faina beihpui thlak a ni a, tun hmaa rel station tawp tak tak te chu an vawng fai tawh hle a ti a. Ayushman Bharat chu khawvela damdawi lama inenkawlina, health sector-a insurance ropui ber leh lian ber tia sawi ngam a ni a ti a, Jal Jeevan Mission hmangin ram chung hmung hrang hrangah tui connection pek a ni bawh a ni a ti a. Ram venhimna lamah pawh a thawk tha hle tih sawiin, beihpui thlakna hrang hrang- Balakot strike te, surgical strike te, leh operations hrang hrang te chu ropui a tih thu a sawi a, China aiin India-ah mihring an tam zawk tawh chungah hetiang zat mipui te tana an hmalakna chu ropui a tih thu a sawi a, NDA kaihhruai sorkarin

kum sawm-pahnih chhunga a hlawhtlinna chu a hmu tur tan chuan a hmuh theiha a hriat thu a sawi bawk a ni.



12 YEARS OF NDA GOVT

Prime Minister Narendra Modi kaihhruai NDA sawrkar kaltlanga tanpuina dawngtu Vairengte tualchhung mi ten an chhawr tangkai thu an sawi.

Vairengte-a Akashvani Correspondent Doreen H. Sangmawii'n Vairengte-a cheng sawrkar laipui scheme chhawr tangkai hrang hrang a kawmna ah mipuiten an chhawr tangkai thu an sawi a, hamthatna hrang hrang an dawn chuan an khawsak a ti awlsam an ti a, chenna in neilo ten sawrkar kaltlangin chenna in an neih thu an sawi a, PM-Kisan kaltlangin loneituten tanpuina an dawng tih sawiin Ayushman Bharat hnuai Golden Card nei ten an hman tangkai thu an sawi bawk.

Prime Minister Narendra Modi kaihhruai NDA sawrkar hian kumin hian a kum 12-na a tling a, hemi pual hian Akashvani News Aizawl chuan sawrkar laipui hmalakna hrang hrangah mithiamte a kawm a, hengte hi Akashvani News Aizawl youtube channel leh Social media hrang hrangah hmuh leh ngaihthlak theihin a awm a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



PM

Prime Minister Narendra Modia chuan ramchhung mipui vaibelchhe 140 te beiseina tihlawhtlin a tiam. Nimina New Delhi-a Bharat Mandapam-a NDA Conclave-ah he thu hi sawiin PM MODia chuan mipuiten NDA-a rinna an nghah chu a sawnghet zel tih a sawi a. Kum 12 chhunga mi rethei vaibelchhe 25 chuante khaichhuah an ni thei chuan NDA sarwkar policy dik zia leh a kawngzawh mek that zia a tilang a ni a ti bawk.

Nimin vek khan NDA thukhawm chuan India Prime Minister ni rei ber dinhmun Prime Minister Modia'n a luah thei chu an lawmpui thu resolution siamin an pawm a ni.

Puan tawh angina Prime Minister Narendra Modia chuan nimin khan India Prime Minister ni rei ber dinhmun hauhin ram chanchinah bung thar a kai a. Pu Modia hian kum 2014 May ni 26 khan Prime Minister nihna a chelh tan a. Kum 1952 May ni 13 leh 1964 May 27 chhunga Jawahar lal Nehrua'n PM ni rei ber ni sang 4 leh 398

chhung Prime Minister nihna alo chelh tawh chu vawiin khan a rawn khum a. PM Modia hian vawiin khan ni sang 4 leh 399 chhung PM nihna a rawn chelh chiah a ni.

<><><>

DEFENCE MINISTRY

Defence Ministry chuan Indian Navy te tan cheng vaibelchhe 449 man Enhanced Capability Global Navigation Satellite System (GNSS) 20 leina turin Jammers nen inremna an siam. Heng satellite siamnaah hian zaa 75 chu tualchhung kutchhuak ni turin inremna siam a ni a. New Delhi-a inremna hi ziah niin Defence Secretary Rajesh Kumar Singh hriatpuinain ziah a ni.

<><><>